



“Nijedan čovjek ne treba reći da sam ja bolji od Junusa b. Mettaa.”

Ibn Abbas, radijallahu anhuma, prenosi da je Allahov Poslanik, sallallahu alejhi ve sellem, upozorio: “Nijedan čovjek ne treba reći da sam ja bolji od Junusa b. Mettaa.”

[Vjerodostojan] [Muttefekun alejh]

Nije dozvoljeno da iko izjavi da je Allahov Poslanik, sallallahu alejhi ve sellem, bolji od Junusa b. Mettaa (Metta je ime Junusovog oca, a nije ime njegove majke, kako to misle neki ljudi). Vjerovjesnik Junus jedan je od plemenitih i časnih Allahovih vjerovjesnika, koji su poslani s uputom i svjetлом, da bi izveli ljudi iz tmina zablude na svjetlo vjere. Allahov Poslanik, sallallahu alejhi ve sellem, ove riječi: “Nijedan čovjek ne treba reći da sam ja bolji od Junusa b. Mettaa”, izgovorio je iz svoje velike skromnosti – poznato je da je on najbolji čovjek. A postoji mogućnost da je ove riječi izgovorio prije nego što mu je Svevišnji Allah objavio da je on najbolji čovjek. Budući da se Poslanik islama plašio da bi neko, čuvši događaj s Junusom, mogao o tom vjerovjesniku pomisliti nešto loše ili ga nipoštavati, izrekao je ovaj hadis. Događaj s Junusom zabilježio je imam Suddi, prenoseći predanje u vezi s tim od Ibn Mesuda i nekih drugih ashaba. U tom se predanju navodi sljedeće: “Svevišnji Allah poslao je Junusa stanovnicima Ninive, naselja u blizini Mosula, pa su ga oni utjerali u laž. On im je kazao da će ih kazna neizostavno stići, tj. da će biti kažnjeni u dogledno vrijeme. Vjerovjesnik Junus naljutio se na svoje sunarodnjake i otišao. Oni su se, vidjevši da će ih stići kazna, pokajali, povinovali Allahu i povjerovali u Njega. Gospodar je primio njihovo pokajanje i poštedio ih kazne. Što se tiče Junusa, on je tad bio daleko. Naime, ukracao se u lađu i ona je zaplovila. Međutim, na pučini je lađa gotovo potonula zbog toga što je na njoj bilo previše ljudi, tako da su donijeli odluku da pomoću bacanja kocke izaberu koga će baciti u more. Kocka je tri puta pala na vjerovjesnika Junusa. I zaista, bačen je u more. Nakon toga, progutao ga je kit. U utrobi kita Junus se dovom obratio Gospodaru. Allah je tu njegovu dovu uslišao i izbavio ga, tako ga je kit izbacio na obalu mora. Uzvišeni Allah dao je da na obali nikne i izraste vriježa tikve kako bi se mogao skloniti u njen hlad.”

النّجّات الخيريّة
ALNAJAT CHARITY

